



## **Giachen Martin Curschellas-Maisen**

**17.09.1926 - 01.10.2000**

La fiasta dil s. Rusari igl 1 d'october 2000 ha il Tutpuissent clamau siu survient tier la cuminanza perpetna. Giachen Martin ei naschius ils 17 da settember 1926 a Surrein. Sco fegl da Luis Curschellas e Barla Catrina nata Berther ha el passentau ensemes cun aunc 5 fargliuns ina emperneivla affonza ella biala ucliva. Suenter haver frequentau las scolas ordinarias en Tujetsch ha Giachen Martin bandunau Tujetsch e luvrau zacons onns ella Bassa vid lenna. La patria ha denton carmalau il giuven a casa.

Cheu ha el luvrau tier differentas firmas. Sia occupaziun principala ei denton stada la lavur egl uaul. Buca meins che 45 onns ha G. Martin impundiu sias forzas sco luvrer d'uaul tier la vischnaunca da Tujetsch. Duront 25 unviarns ei el s'engaschaus sco luvrer tier ils runals a Tujetsch. Quei fatg attesta sia fideivladad en las duas interpresas e ses conluvvers san sincerar da buna e cunscienziusa lavur.

Igl onn 1957 ha Giachen Martin baghegiau casa a Mira. Havend ussa ina nova dimora ha el maridau igl onn 1961 Alexandra Maisen da Siltginas/Sumvitg. Da lur famiglia sorteschan 5 affons, 2 buobs e 3 mattatschas. In buob miera denton sco baret. Per la famiglia ha il trapassau adina giu grond quitau. Malgrad ch'el era stregns, cunzun quei che pertucca il haver uorden, eis el staus in bien consort e bab. En cumpignia steva Giachen Martin bugen e rieva da cor. Schegie plitost da siu persei era el buns per in stuc ni l'auter.

Speciala satisfacziun han ils cuolms rendiu al trapassau. Mintga ura libra nezegiav'el per ir per crappa e guder quella libertad. Quei fuva siu deletg cumplein. Ins astga era pretender ch'el fuva in passiunau mo era fetg capavel cavacristallas. Ses loghens preferi eran Caschlè, Nalps, Cavradi e Val Val. Ina bellezia collecziun da mulai, neras e prezias alas fier dattan perdeta da sia capacitat.

Memia baul ha ina maligna malsogna denton sfurzau igl um plein forza da seremetter e star giu ella val e contemplar la pezza maiestusa da casa anora. Capeivel che G. Martin ha acceptau vess. Sia dunna e famiglia han denton giu grond quitau duront quei liung temps dil bab e levgiau sia sort. En tutta tgeuadad e cumpleina cunteintscha ha el saviu bandunar ils ses ed il terrester. El ruaussi en pasch.